

名山縣志卷二

知縣事遵義趙 懿纂輯

山原

蒙山 境內之鎮山也唐改曰始陽山在城西北十五里山高數千仞綿亘不可以里計江分汶笮氣衍岷嶓窠窠峩連峯疊嶂蓋至此若蒼龍之矯首耳舊志謂仰則天風高暢萬象蕭瑟俯則羌水環流眾山羅繞茶畦杉迳異石奇花足稱名勝山頂五峯中曰上清峯左曰菱角峯靈泉峯右曰甘露峯毘羅峯五峯酷肖蓮花蒼秀勃鬱中爲

禁籙護

名山縣志卷二 山原

一

貢茶七株卽甘露慧禪師手植蒙頂茶也自漢迄今不枯不長謂曰仙茶七株外曰陪茶曰菱角灣茶亦隨計貢旁有甘露井卽禪師示寂處今封以石不可啟動動則雷雨立至爲祈禱之所叢林古剝凡七絕峯曰天蓋寺山左曰智矩寺聖燈寺淨居庵天竺院山右曰蒙泉院永興寺皆蒼林古木絕壑飛泉蒙泉凡數百道合流成川卽青衣江也奇蹤妙蹟不可勝紀散見各門

尙書禹貢正義地理志云蒙山在蜀郡青衣縣**水**

經注沫水出岷山西東流過漢嘉郡南流衝一高山山上合下開水逕其間山卽蒙山也昔沫水自

蒙山至南安西溷崖水脈漂疾破害舟船歷代爲患蜀郡太守李冰發卒鑿平溷崖河神鬩怒冰乃操刀入水與神鬪遂平溷崖通正水路開處卽冰所鑿也元和郡縣志蒙山在嚴道縣南十里今每歲貢茶馬爲蜀之最太平寰宇記名山下蒙山在縣西七十里北連羅繩山山接嚴道縣九州志蒙山者沐也言雨露蒙沐因以爲名山頂受全陽氣其茶芳香又云始陽山在蘆山縣東七里本名蒙山唐天寶六年勅改始陽山高八十里東道控川歷嚴道縣橫亘入邛州火井縣界祝穆方輿勝覽禹貢梁州之山四岷嶓蔡蒙西山皆岷山北山皆

名山縣志卷二 山原

二

嶓南山皆蒙山也

皆嘉定府舊志引作背

輿地紀勝西漢時

有僧從嶺表來以茶實植蒙山忽隱池中乃一石像今蒙頂茶擅名師所植也至今呼其石像爲甘露大師又引王庠蒙頂茶記唐志貢茶之郡十有六劍南惟雅州一郡而已又引雅安志蒙山屬名山縣山有五頂前一峯最高曰上清峯有甘露茶山上常有瑞相影現又有蒙泉范蜀公亦云常有瑞雲護其上又云智矩寺在名山之蒙頂山甘露大師聖迹今石身在夜多聖燈變現楊慎記名山之普慧大師本嶺表來流寓蒙山按碑西漢僧理眞俗姓吳氏修活民之行種茶蒙頂歿化石爲像

其徒奉之號甘露大師水旱疾疫禱必應宋淳熙十三年邑進士喻大中奏師功德及民孝宗封甘露普慧妙濟大師遂有智矩院歲四月二十四日以隱化日咸集寺薦香宋元各有碑記以茶利由之興焉夫啜茶西漢前其名未見民未始利之也浮屠自東漢入中國初猶禁民不得學賀如晦記稱西漢吳姓則華人也時安得華人為僧乎考之張大用本圖經稱後漢有高僧攜茶種蒙山茶為天下利益然後為投井化石其徒負以鑿像為堂奉之又稱梓潼神君附鸞碑記正其為後漢人名理真西漢之稱豈欲古其人大用之記豈欲神其

名山縣志卷二 山原

三

迹耶山海經海內東經大江出汶山北江出曼山南江出高山 國朝畢氏沅云今四川名山縣西有蒙山曼蒙音相近疑是也按此說近鑿水經注南安縣南有峨眉山有濛水即大渡水也輿地紀勝引嘉定志峨眉山在禹貢則蒙山之首也 國

朝錢氏站新斲注地理志並段氏玉裁說文註即以峨眉山當蒙山亦非是張澍蜀典屈子天問云桀伐蒙山何所得妹嬉何肆湯何殛王逸注桀伐蒙山之國而得未嬉按列女傳以為伐有施得之師古曰有施之女蓋以國語注言施為喜姓國也淮南子亦云桀伐蒙山得妹嬉羅長源謂蒙山即

岷山非也竹書紀年注后桀十四年命扁伐岷山氏岷山女於桀二人曰琬曰琰后愛之無子乃斲其名於苕華之玉苕是琬華是琰而棄其元妃於洛曰妹嬉蓋蒙山所得者妹嬉岷山所得者琬琰皆蜀產也按此辨極是

優貢生吳之英蒙山賦咨蒙山之劣崩淑造化之劈割攏西徼之旁唐絡益都之褰襞涵嶓嶺以嶠釐緼岷陬之峇牢瑣劍閣其峯巒趨峽峯而巘壑溥沆漑以激凝園鹵磧之蹇迫累日丸於霄冥噓風竅於巽白爛金碧於陰陽馨嬰瘞之冢席隤鼻屬之神功紀封奠之靈跡敞疏寮而望遠步紆阜

名山縣志卷二 山原

四

以遐窺兀眩眯於块莽邈滅殞以駭疑嚴精魂以毆駸揆隅鄉之幅維赧朕端於芴怳璫狀兆之闐麗冠曉赧而蔚擢浥宵靄而潤滋殫縟綢於新翠薄光晷於陽曦詭昏旦之異氣渺伏露其無時浮葩蓋之圓頂構曾璫之虛基括搃素以亡鄂惘淑化之離奇巡虛止之飢周脈澄堦之般枉陟運裊而猓回踐隘害而怯仰悸垂足於二分栗陷鄰虜尋丈儵誕登於狔鬣葦眙眊於氛块墳地脈之沃膏縈星巒之森爽啟蠹菌之荒圖亘蛩螿之異像澗積縐而泉洑穴閭繆而沙磧陰氣積以凝寒清音作而應響增睜矚於幽霾闇傑儻之遙岵輯珍

怪之糾棼徒目厭而心賞藹林藪之菀豫灌卉木
之芳菁族綺綿之陽藥少蓁柅之寒英緣陲隋而
鋪繡揜溼呈以拏莖宗霑霽而沍雨揚郁烈以蒸
晴剖苞房之窠窕醞醴蜜之醒營華葉雜其駢偪
朱紫錯而崢嶸穠纖次而接亞茂悴隱以代更匪
藉力於蒔蓺自應節以時成絜飛走之殊生孳胎
卵以攸託營窟巢以栖息時鳴噪而馴若莓苔別
其蹠迺芝菌儲其飲嚼霧藹舒而交咻霜柯零而
驚躍綵翩翻以駭駭紛眴嚇以蹲躩遂雌牝之孕
字達縱雛之蠢弱熠章采於羽皮蠻腥羶於巖壑
疲畢羅之羈結憊繳鋌之捩斲暢和煦之開動昌

毓產之萋萋天頰圍而山黝雲轉逕而樹齊詞嘽
聚夫樵牧還往淆夫臧奚循采采於迴磴聆丁丁
於故蹊延峩眉之素魄翦綠菜之新萸埃翠豕以
夷猶倚滑壁之黯鬣盈掬檐而提負絜瀨筥以招
攜意滌躍其恐隊神忽罔而復稽浮微茫之莫景
暫翫折以閔睽惟神秀之隩區實仙靈所垞徙眺
振錫以寓廬迎飛鳧而納履淫滑滑之天漿滲泠
泠於石髓飄衣帶之縻襪寅苔藁之猗蕤唳絕巘
之笙簧冽深溪之江水靄困雲於鹿車綴石花於
鶴軌杳燦光以降迎恆戴勝而徙倚感積刑之隋
刻悟樂仁之岵嶢識頤性於寂靚期選形瘳湫囂

偉藏疾之蕃富鑠任重之竦喬跨安窵而念遠跋
嶮覆而情超警疲羊之騰趨悵痛馬而栗慄徹塗
石之耑解虞岸氏之演搖忻油油之藎薈懼憾憾
以霽凋希邁長其馭蔓永厚利之羸饒懷貞一以
蟠時蒼網緼而蒸歆搯得止於純素眇五嶽之遙

遙 知縣胡壽昌三登蒙山采茶序 一嘗考陶穀

清異錄載吳僧日住蒙頂結庵種茶凡三年味方
全美得絕佳者曰聖楊花又爲吉祥藥所采不踰
五斤持歸供獻不復再摘此蒙頂仙茶之始也復
考毛文錫茶譜載蒙山頂茶以石花爲最按蒙頂
與蔡山對峙孤峯獨秀陡壁千尋昂藏天際迤邐

名山縣志卷二 山原

六

而登盤旋二十餘里始達山巔山有五峯環列狀
如指掌曰上清曰甘露曰玉女曰井泉曰菱角仙
茶植於中心蟠根石上每歲采仙茶七株爲正貢
分貯銀瓶以菱角灣所產爲幫貢此石花之所宜
列於上品也其造茶之法正貢隔紙微烘不令見
火揀精潔者六百片入貢餘則分致同官每盒不
過五片寶如奇珍收藏數載蒼翠如故其見重如
此菱角灣陪茶仍焙顆而清芬過之昌以庚申四
月恭率寮屬初登蒙山采茶循舊章也時滇寇初
平閭里安輯隣氛不犯邊鄙藉以培養民氣感山
靈之精爽爰爲賦詩以誌寅恭 二辛酉四月循章

采茶時當用武之際不及舉行既克亂復調辦魚
通夷務月餘始得蕝事乃於五月既望由雅郡渡
青衣江至新寺小憩清風迎爽旭日初升南望江
水橫鎖中流瓦屋凌虛花溪映碧復從蹬道攀躋
十餘里始達大五頂俯視洞口雲生雨驟至風亦
不息須臾煙消日出晴朗如初仍循舊路陟千仞
之岡聽百道紅泉如跳珠戛玉仰望山巔松蘿交
映竹相青蒼洵足怡人心目頓忘險阻之在前也
午後登山肅拜采葉盈筐如法製造山僧進收藏
團茶汲蒙泉試之芬芳異於常品按歐陽永叔歸
田錄暨葉夢得石林燕語載慶歷中蔡君謨爲福
州轉運使別擇茶之精者爲小餅龍團以進其品
清絕嘗縷金花於上宮中每值南郊致齋書樞密
各賜一餅四人分之自是遂爲歲貢蒙頂團茶適
與福州茶餅相類蓋亦不減於密雲陽羨矣爰題
詩於石以紀之^三張舜民畫墁錄載茶品盛於有
唐以陽羨爲上供建溪北苑未著也近世修建溪
之貢士大夫珍尙鑒別亦過於前人至丁晉公爲
建州轉運始製大龍鳳團所貢不過四十餅專擬
上供雖近臣之家未嘗見也天聖中又爲小團縷
之以金惟上齋宿八人兩府共賜一餅持歸以侈
非常之賜親知瞻玩賡和以詩歐陽永叔亦有龍

茶小錄茶品之貴莫盛於此迨

國朝則兼以蒙山仙茶爲上供製作與古微別亦非始於近代嘗考熊蕃北苑茶錄載萬春銀葉造自宣和二年玉葉長春造自政和二年其正貢不過四十斤今蒙茶焙作固以同於宋製矣宜其生於磐石色味迥殊大觀茶所稱冲澹間潔韻高致靜之品信乎其不誣也

〔宋〕孫漸智矩寺留題郊行半舍近炎曦正欹午涉淺水粼粼陟高峯伍伍寺藏翠靄深門映蒼松古明暗雙泯時榜名標智矩入憩望遠亭好風聲清暑素曳瓦屋煙虹掛蛾眉雨千里豁人懷萬象紛

名山縣志卷二 山原

八

指顧步廡閱刊碑開龕禮遺塑香火肅僧儀堂皇涼客屨繼登凌雲閣倚欄眺茶圃昔有漢道人薤草初爲祖分來建溪芽寸寸培新土至今滿蒙頂品倍毛家譜紫笋與槍旂食之綠眉宇雷動轉蜀車雲屯富秦庾我貪事幽尋更值忘形侶鼎抽竹葉燒餅汲龍泉煮暫啜破積昏飄飄腋生羽相對話夜闌螢點流星度金雞鳴一聲回首關頭路會約摘春山十詠龜蒙具 〔碑跋云〕都轉孫公眉陽之名士也德行純固文章妙絕曩以雅安上幕行按諸邑每探幽尋勝莫不寓意風騷皆雕玉鏤冰盡一時之美頃朝廷以治行優嘉詔除河東路保

甲兼提刑當是時剛中蒙公置之門生之末今領
茲邑幸覩云云 闕 門生通直郎知縣事管句學勸

農公事同監茶場賜緋魚袋張剛中上石 明侍

講葉桂章蒙頂詩數朵芙蓉插半天一雙龍象擁

青蓮尸骸已解餘丹竈老衲當年臥石泉又 甘露

寺詩一掬靈湫天上來數莖仙掌削蓬萊行雲行

雨飛金相踞虎蟠龍繞鷲臺 國朝知縣徐元禧

蒙山二首上山高不極古木欲參天星斗胸中燦

風雷足下旋豹潛山隱霧龍躍雨流泉歸向懸樓

望飛青到檻邊五頂參差比真成一朵蓮茶香開

淨土苔厚閱甘泉石屋能藏月雲梯可到天禹功

名山縣志卷二 山原

九

誰記取書載旅平年 李應元登蒙山詩振衣百

仞岡頭路蒙頂蒼蒼倚大羅欲向天邊看五岳先

從雲際揖三峩上清峯冷餘霜雪甘露泉空只薜

蘿莫謂天台迷舊處青鞋綠杖擬重過 知縣王

寶華蒙山採茶詩三首滄海桑田世幾更柯條不

改護山城須知土物應修貢未必神仙也好名一

笑凌雲登絕頂千年化石葆全貞至今衣鉢何人

記枉說來遊到上清野鶴孤飛悟守真散花隨手

便成春高僧暫向深山住小草常教古色新菱角

有緣陪漢樹桃源何處訪秦人蒼苔獨立斜陽外

笑指芙蓉洗俗塵振錫來遊海國賒老僧到處便

爲家萬山秀氣歸蒙頂千載奇聞說漢嘉草木有
靈傳不朽蓬萊欲訪悵無涯莫嫌宦味清如水遲

挂秋帆爲採茶

訓導黃樸詩

原題杜若洲明府
招游蒙山登上清

峯觀採茶時明府兩公子及幕府
李君和軒茂才陳君玉堂同在

昔從華陰游仰

見華山高三峯轟轟連雲霄歸來浩歌一回首仙

掌蓮船復何有蜀人誇蒙山山在黎雅間近帶青

衣曲遠接峨眉彎中有神物藏五頂分孱顏我聞

此言覺心醉萬壑千巖縈寤寐盧敖放曠古仙人

願假尻輪雲外戲杜工部李青蓮招邀山谷遊蒙

巔少陵翩翩兩公子元龍載酒相後先初行至山

麓仰看舌欲縮身非猿與猴焉能鳥相逐藍輿款

名山縣志卷二

山原

十

款索繫輻輳夫叱馭聲如哭嗟爾輿夫且勿哭小

憩山腰僧有屋陳君置酒慨且慷引盃一呷精神

王興來直上不知險雲飛石墮天蒼蒼天蒼蒼山

兀兀井泉噴薄蛟龍窟毘盧甘露相鉤連上清菱

角爭比肩五峯簇簇如手指掌中之骨石之髓古

有仙人甘露師拾得靈根種於此大小高低有七

株第一株長尺有咫不生不滅已千霜欄杆屈曲

圍其旁上有滾滾仙露灌其葉下有清清雅水濯

其光欄外虎臥吼爪跡大如斗天愛此靈竒特使

鬼神呵護勿嬉嬉於是明府來魚鑰開焚香盥沐

載拜稽首於石磴之臺曰惟

皇帝陛下澤及庶物長此靈芟爲郊

天用惟

清廟材微臣職司此土敢不欽哉乃落其芽乃去其蒂芽則
油油蒂亦泥泥金鑊烹活火銀瓶貯清麗採罷龍
團作歸計瞳瞳晴日枝邊搖七樹綠雲風刁刁祖
師有象刻石上剜苔剔蘚瞻高標下山卻比上山
易穩坐肩輿仰面睡忽然天梯石棧爭動搖恐逐
飛仙直向空中墜我乃下輿行踏石聲鏗鏗道旁
時縱目勝蹟天生成老松臃腫龍鱗橫巉巖沙落
號鷗鼈劃然長嘯天爲驚卻立四顧呼雲駟歸來
伏枕憶前事夢裏重遊上清地醒時何處是蒙山

名山縣志卷二 山原

十一

寫向烏絲猶不啻卻笑古盧同未到名山中兩腋
習習空生風 邑舉人陳善言次韻誦君蒙山歌
字字格律高迥如鸞鶴凌霄西華東岱徒搔首
供人觴詠眼前有禹貢紀蒙山旅平在其間峩蔡
遙峯矗青羌曲水彎上有仙茶茁充貢喜
天顏神嗜苾芬祝具醉物產精靈通

帝寐肯偕鳳餅與龍團徒逞生風事游戲石排筍峯吐蓮七
株參差列高巔雲蒸霞蔚長封護種植直溯漢代
先靈根藏嶽麓旗槍展復縮採摘候雷霆凡品焉
能逐倘棄爾輔無完輻神物暴露山應哭山僧惟
恐山靈哭飾以雕欄勝華屋昔人對酒慨當慷賢

濁聖清爭霸王我今持此訂茶經引甌翹首蒙山
蒼蒙山蒼蒙樹兀蒙莽先試蒙泉窟吳中洛下舊
相連陸羽盧同共拍肩茶中故事從屈指飲瓊膏
兮啜玉髓換骨輕身眾說紛那能芳香有如此暫
隨仙人遊汗漫員嶠方壺在尺咫上清雨露菱角
霜蒙芽錯落挺其旁但見祖師醍醐灌其頂又有
毘盧卍字爛其光夜聞獅子吼諸天滿星斗蓮社
擅絕奇唯有塶爐石銚長嬉嬉憶昔佛祖來茶畦
開攜鑿持畚披荆斬棘坐雨花之臺曰惟茲山峻
秀陽氣獨厚宜此異芟爰挂飛錫迺樹靈材自茲
永永年代食其利哉石窟蟠根雲邊結蒂枝則森

名山縣志卷二

山原

十二

森葉斯泥泥麥穎豈足珍石華常稱麗不生不滅
歲難計仙茶馥郁仙露搖一番風信響刁刁翠屏
霧鎖遙瞻拱紫府霞飛高建標俗云得此良非易
飲之夜長可不睡匪獨除煩滌渴有奇功是能飛
昇不與塵劫墜羨君蒙山行浩歌金石鏗到處留
著作佳句本天成心花怒發醉墨橫古壁蟠螭棟
飛甍謫仙俯首少陵驚無由轟烈逐雷駟嗟予家
居累俗事不及執鞭遊勝地三復涪翁採茶歌卽
謂曾遊亦何啻異時蠟屐同淪茗此山中飛符調
水繼高風 建南觀察黃雲鵠蒙頂留題天遣我
西來漢嘉節兩駐五載望蒙山客冬始登顧山靈

勿相笑遊非政先務邊靜歲豐和重遊補前誤解
渴嚙仙茶滌煩沃甘露更喜四山青雲芽千萬樹
利澤資山氓辛勤助王賦寄聲管領人隨時好培
護 遵義趙怡蒙山十詩碧溪流百折邨路與回
沿水碓藤陰溼山扉花樹然樵歸蒙頂雨鳥帶淺
蠻煙自有桃源意清遊盡日延花溪夜半百靈集
朝千佛光珠林度明滅金澗裊佝昂明月生東嶺
疎鐘靜上方時聞佛現鳥數語報僧房聖燈庵斷壑
雲根冷飛橋日色陰瀑泉喧樹腳禪院住峯心篤
耨香熏座頻伽鳥哢林仙茶間手煮品水坐煙深
蒙泉院大師金粟莊紺殿擁天香雙塔摩雲直千花
映日涼苻雲蠻徼遠羌水禹蹤荒高閣窮遊目茲
來興欲狂智矩寺觚棱掛雲表古寺著中峯滿地漢
唐樹三天朝暮鐘佛馴守茶虎僧豢聽經龍欲訪
靈師蹟還從五頂逢天蓋寺蒼翠五峯巔靈根風露
纏

貢香三百葉仙植二千年品重

園丘祀枝披

禁籞妍於菟雙白額長護碧雲眠茶園高僧化石去遺甃
覆莓苔蹟往數千載幽尋今獨來靈根七株灌香
霧五峯開乳滴傾聽久還防動雨雷甘露井五頂作
蓮花花心甘露家化身留白石幽窟闕丹霞階下

巡茶虎門前掛樹蛇安心方就問何事但趺跏甘露

石室老衲偶然去蒲團懸樹巔山風吹不落知經幾

千年自識西來意莫問龍牙禪蒲團樹不結貝多子

不長娑羅陰開花並著葉根幹已空心八寶幻空

色漢時生至今八寶樹又與弟懿登蒙山詩恆岳歸

來兩屐青叩黎西過酒初醒五峯飛策雲生袖一

碣捫題雨溼銘欲探龍湫試湯品便尋虎澗續茶

經明朝又泛巴船去憶爾看山立縣庭知縣趙

懿蒙山十詩三十八蒙峯峯峯暗碧松幽溪抱邨

曲流水出雲封谷鳥時鳴止蠻花自淡濃深林原

未暝殘日下高春花溪法鼓振琅琅靈燈謁上方霏

名山縣志卷二 山原

十四

霏似蓮萼冉冉度林塘哀壑生虛籟高齋聞異香

老禪方入寂應放白毫光聖燈庵崖壑響潺潺山僧

半掩關嶺雲生石罅泉水抱花間漏閣欹千仞平

羌劃百蠻石樓最疏敞頰眺立孱顏蒙泉院寶地金

繩裊靈師法像妍竹搖敲磬月松颺焙茶煙雙堦

截雲表千峯落眼前孫君剩殘碣剔蘚爲留連智矩

寺不知何代寺著在白雲巔苔磴滑疑雨松林陰

暗天仙茶三百葉銀杏幾千年絕頂尋靈蹟峯心

卷碧蓮天蓋寺蛇虎蟠

靈籙風嵐護

貢茶七株甘露種五頂碧雲芽典祀

園丘重香同日鑄誇慧師真妙力一物獻

天家

茶園

泉乳滴玲瓏櫛溱暗五峯老僧曾化石孤客靜看

松一物濟人世千秋訪名蹤於今正憂旱私欲禱

蒼龍

甘露井

大師千載後靈蹟在人間咒龍行作雨

制虎臥當關石室蒼松靜仙園紫茗環維摩默無

語吾自眺青山

甘露石室

擁腫不材木得以終天年結

癭數千載頗似蒲團懸想見師子座菩提樹下禪

蒲團樹

莊嚴七寶樹花果金繩旁華光如來佛演暢

妙法場異哉師手植焦榦濃花香

八寶樹

又秋登蒙

山詩清秋好天氣蹭蹬入名山寺在峯巒裏泉鳴

雲樹間遠水落帆迴平原飛鳥閒登樓啜仙茗一

名山縣志卷二

山原

十五

暢野人顏又蒙山采茶歌崑崙氣脈分江河枝榦

漫衍爲岷嶓岷山東走勢欲盡散爲青城玉壘兼

三峩其間一峯截然立禹平水土曾經過奔泉流

沫數百道鴻濛雲氣相盪磨昔有吳僧號甘露結

茅挂錫山之阿偶然遊戲植佳茗豈意千載留枝

柯五峯攢簇似蓮萼炎暘雨露相調和靈根不枯

亦不長蒙茸香葉如輕羅自唐包

貢入天府薦諸

郊

廟非其他火前摘取三百葉諸僧膜拜官委蛇銀瓶縑箱慎

包裹奔馳驛傳經陵坡愈遠愈奇極珍重日鑄顧

渚安足多古今好事有傳說服之得仙無乃訛玉
盃靈液結香霧唯此已足超同科一物芳菲不可
閱自宜寵眷邀

天家葡萄天馬隨漢使叩竹蒟醬踰牂牁人生要自有絕
特泥塗碌碌知謂何偶思屈子頌嘉橘濡毫爲作

蒙茶歌

月華山

據前琴
餘日劄

舊名月心山一曰羅漢山又曰箭

竹坪

據府
志

在城北隅形如偃月氣脈自蒙山來蒼蒼

莽莽蜿蜒遞入縣治突然而止各公署皆在其下巒
宮踞其巔巍巍峩鎮重足壯瞻仰山多古樹榿楠桂柏
檉杻蒼蔥蒨蔚四時不凋春則倉庚杜宇鳴其上秋
則亂蟬孤螢噪其間以城市而具山林之景也披襟
眺矚北顧蒙山蓮花諸峯瑞雲凝伫南瞻青衣水透
迤曲折灌溉平疇風景最妙山下有八角井亦謂之
月華井云

名山縣志卷二

山原

十六

華陽周志新秋日雨後偕同人登月心山晚眺詩
雨餘山色淡復濃攜伴登臨看遠峯旅客羈留悲
去雁長松天矯欲成龍泉聲咽石添新韻巒翠經
秋變舊容一帶紅牆圍古寺晚煙鎖處聽疎鐘

趙懿晨起登月華山望蒙山蓮花諸峯蒙山十里

外蒼蔥來滿城岩堯青蓮出窈窕白雲橫秋色遠
逾淨晨光淡更清不知何寺宇隱隱搖鐘聲閑登

廨後山矯立對崢嶸曠然遺榮辱殊悔勞簪纓
〔晚登廨後山〕悶撥文書被酒行晚風扶我踏崢嶸
官衙頗有山邨趣簌簌空林掃葉聲
〔遵義趙恆〕
〔詩〕平疇新綠莽高原日暮牛羊下遠墩一抹疎煙
兩行樹半溪流水數家邨

紫霞山 一名石壁山又名觀坪山在城南隔水一
里縣治之案山山左有紫府飛霞洞中有石龍屈曲
靈妙相傳 文昌帝君示化之所又有親製碑二通
自宋建梓潼觀頗極閎敞舊志謂境地清高煙霞明
媚令人有飄然羽化之思後於山左建奎閣與之對
峙邑中科第文采之盛鍾靈於此觀後右側明翰林
葉桂章墓在焉前有紫霞井甘冽宜茶

名山縣志卷二 山原

十七

〔神君張亞子紫府飛霞洞碑記〕

按此碑陶文毅公
澍日記亦採數語

當非
附會

吾舊生越嶲間按越嶲爲郡居天下之西南

角得坤之用在漢時戶僅十四萬其俗多營窟版
屋而息如上古穴居野處之世其地則多土礦巖
穴接黎之邛苻都雅之靈關道自唐大斥土宇包
夷荒而郡縣之民不堪命越嶲遂與中華壤斷土
隔真人幸啟偃兵息民執玉斧而劃棄大度之外
越嶲遂淪嗚呼吾將安歸當以黎雅爲鄉也黎之
邛峽關有靈應洞乃吾之變化所惟古蒙舊屬漢
嘉之青衣其俗醇厚簡古如周民好善堯民可封

其地襟帶巖巒如太華之磅礴岷峨之嶙峋吾嘗
愛而居焉近奉 帝命往來全蜀至則寓之以
行化恨榛莽掩翳如小有清虛之所吾必久留邑
下苟洙父子念此甚久吾知而直命之乃忻然於
吾殿後斬荆棘去茅菅爲一洞天費僅二十萬錢
屋穴皆備吾揭爲紫府飛霞蓋本班固賦西都據
坤靈之正位放太紫之圓方與王勃記滕王閣彩
徹雲衢霞鷺齊飛之義上以示吾不忘故鄉之意
下以期有志於攀鱗者休哉蒙陰之下亦有變化
之所矣後之人有能自勵而期爲汗漫游者乎然
東山舊祠興自紹興丙寅逮今年丁卯始克有洞
穴而洞穴不成於他人而成於苟洙父子亦有數
也一日苟洙欲紀年月日此事非神其誰宜爲吾
亦爲忻然親書於石開禧三年六月十八日 知

縣朱景辰鼎勒梓撞風洞碑記文昌帝君主宰文
章聰悟宏宣歷聖儒修天下宗祀萬世權衡也余
在閩未覩化書抵補蜀名始目擊手書碑文想博
濟之宏恩仰誠通之廣大九十四化何殊觀音大
士千眼千手百變萬化總以啟迪羣蒙趨歸正果
爲願故稱七曲則儼係天上星辰有石龍現顯潛
龍妙用讀飛霞遺記豈但學貫漢唐歎筆墨秀蒼
直邁羲旭草篆事幻洵實 神昭勿爽 帝之神

在天 帝之靈在世 帝奇跡多著蜀今梓潼縣
東二十里演兵壩胡赫赫也九曲者以 帝來朝
之九曲七曲則 帝逐五丁路行山腰之七曲焉
茲名山行化更有異者紫霞高峯相傳神龍碾成
洞穴盤旋曲折於中龍像酷精非工技所能繪肖
眞天授非人力至親題名山碑石自云此事非神
其誰宜爲圖籌盡善靡間後先特屢進褒封渾融
養德不肯輕露角圭不比向時隨呼響感耳然風
洞仙景曲徑層幽桂子秋香 帝曰清虛道室信
然信然余閩海朽櫟楚郢勞薪思 帝忠孝立極
仁義顯施慨子衿於茂草頻年民牧武健禮樂淹
荒幸今抵任捐建本衙佛樓晨昏虔祝 文昌神
像敢不心 帝之心蓄龜勤奉子孫禱祠耶稽
帝由周至後一十七世常爲士大夫代代愛民化
吏克肅官箴脫人危厄濟人渴饑械樸隆蒸慧智
分給勵頽俗揚鼓鐘傳曰聖人百世之師聞者莫
不興起況於親瞻手書似附微躬於親炙未可乎
惟是廊廡空缺樓閣條蕭欲增補而力弗逮思肯
構而民疲苦爰戒諸生朔望焚香定期會課儼侍
帝旁不當浪習汗漫之遊議創議修有能廣大
苟洙父子者 帝式憑臨運數巧符予倘厚藉輝
煌廟貌又當擇吉另鑄顛末祇恐歲月隙駒興廢

改情急勒手撰碑文垂勸示眾云康熙庚戌歲孟
春月穀旦現任名山縣知縣閩古鏞朱景辰字建
北薰沐手撰碑記

明督學濟南王勅紫府飛霞洞詩三首

王勅自號舜田耕夫

有帝君碑跋不錄

飛霞龍洞接靈關變化文昌第一山仙

馭幾時回紫府猶餘詞翰在人間紫府青霄是帝
鄉偶來人世假雲房銀鉤鐵畫眞仙筆夜夜光芒
映斗旁洞前幾朵玉芙蓉紫蓋光中繞六龍留得
雲章傳萬古燦然雙璧是文宗

劉瑩詩二首一

雙白壁屹乾坤灑翰銀鉤紫氣存千古文宗惟仰
止元天幽默更何言天藻文章五色成翰林一見

名山縣志卷二 山原

二十

獨關情文星共訝能相感半夜山鐘爲自鳴

自注督學

王勅謁紫府飛霞洞其夜祠鐘自鳴爲記之

參議內江張應登詩

應登

字夢夔有讀飛霞洞碑記刻帝君碑陰不錄

北斗高標第四星特麾妙

筆在山亭洞雲窈窕金鑾駕翰墨淋漓玉篆銘豈
爲蔡蒙懷梓里端教班馬賦明廷不知紫府原天
上且看飛霞此地靈

嶺南周光鎬詩碑向說飛

霞有洞靈翠微曾落斗魁星上方帝座通呼吸下
界人煙接窈冥劍佩神遊秋氣紫蔡蒙山倚玉霄
青于時井絡逢昌運多少英髦集漢庭

王麀餽

詩曾向窗前捧化書扳鱗到此興扶疎飛霞字已
三朝遠浩劫靈於一洞儲茶味清人花落後桂香

留客雁來初時當夏五探文窟共乞刀圭聽步虛

知縣徐元禧詩七曲文昌帝子家此間紫府又

飛霞爨櫨無恙雲長守鐘鼓有靈夜自撾白衛四

蹠遊八極素龍五爪穴三巴兩行鼃部留親筆千

載人文好共誇 知縣高第詩郭外青山幾曲幽

芙蓉當殿暮霞流相招石簡龍文在肯負仙靈汗

漫遊 遵義趙怡詩招提人不到一徑入雲松洞

古龍遺蛻山深鹿養茸好花扶杖室疏磬過東峯

薄暮禪燈上無心問五宗 趙懿次韻沙鷗散浴

渚暝鶴入巢松風磴颺紅片露簷披綠茸紆流文

曲水疊出青蓮峯吟眺暢幽計永嘉余所宗 又題

名山縣志卷二 山原 二十一

陰碑詩昔年曾夢 梓潼君文袖青衫氣不羣灑

落神翰猶暗記提撕一字似親聞飛霞洞府今瞻

仰斷碣龍蛇頓慰欣百遍摩挲復悲感半生汲古

愧紛紜 自撰格軒茗譚懿少愚拙禱於文昌夢

齋室握朱管書一悔字於卷端默然無言恍然而

去懿遽驚寤猶記一字形家君子因命字曰悔予亦

顧名思義之意也東龍山 一名瞳龍山一名五楓山在城東二里山

有地藏庵竹木陰翠蟲鳥啁雜頗有幽致縣無社稷

山川神祇諸壇春秋致祭於此東龍山下為迎春坪

折而東上為先農壇即迎春耕藉之所有仙洞子塘

東路所自入舊傳爾朱真人嘗鬻白石於市中人無

買者行至此擲之而去移時不見

〔趙懿〕初至名山詩西上邛崃萬仞山孤城遙望似
彈丸昆兒羌女邛邛雜雅雨黎風瑟瑟寒折坂記
驅王刺史青衣知慕大可汗旁人莫爲嗟窮瘠白
酒黃雞也飽餐又途中詩昨自長安下第還謬膺
夷徼一微官六千餘里雞鳴戍二十四盤獐懶山
雪裏影垂邛竹老月明嘯徹杜鵑寒簡書可畏甯
辭遠回首 京華一淚潛

倒馬坎 在城東五里東龍山上

和尚腦 在城東十里舊設舖司今裁縣治東南北
三面皆環高原平疇沃壤坡陀迤邐而惟和尚腦至

名山縣志卷二 山原

二十二

百丈驛其原最長亦最腴利

杜鵑山 在城東十二里地美木茂每歲春深杜鵑
飛鳴其上故名

白土坎 在城東十五里有塘堠

餘光坡 在城東北五里許連山若貫珠齒齒然列
青衣水上行人日暮景色蒼然諸山易昏而此山獨
餘殘照因名

桐子坡 餘光坡別支也

金礦坡 在城東北十里

星廟坪 在城東北十許里

天車坡 在城東北十五里

海盤山 一名蠓盤山 一名海螺山 在城東北十五里層巒疊嶂紆迴盤鬱〔府志〕四時花木芬芳鳥鳴鵲噪誠如樂國

石虎山 在城東北十五里相傳石虎爲害落其牙去其吻

橫山 在城東北十五里近萬古場蓮花峯之支山名山水源皆自蓮花峯出西流爲青衣江東流爲百丈水中以橫山界之也

蓮花峯 在城東北十五里〔府志〕東西綿亘北連邛崃山峯巖秀出如蓮花上有五峯聳列中有蓮池黛色嵐光丰姿窈窕時有白雲橫束其上按蓮花山本八十餘峯嵯峨娟妙靈秀異常白雲橫寫山腰真有無限風景上有蓮花寺亦古刹

〔輿地紀勝〕蓮花山名山縣北十五里有五峯聳立如蓮花

觀音巖 在蓮花峯下兩山崩削千仞青衣水卽出其間

羅繩山 一名盧奴山今名蘆山岡在城東北二十里踞蓮花峯後聯聯延延隱天蔽日莫知其極

〔寰宇記〕名山下羅繩山在縣西五里從蒙山西入蘆山縣又北接邛州火井縣〔方輿紀要〕盧盧山或謂之盧奴山其相接曰始陽山俗呼爲羅繩山

箭竹坪 在城北一里與月華山相連屬縣治卽跨其上

文閣山 在城北二里知縣宋大奎建閣於上以壯文脈

玉几山 俗名大嶺岡在城北六里後枕蒙山蓮花峯前俯竹箭坪月華山遙望之若憑几然

金牛山 在城北十里山如伏牛下飲溪水
金龜山 在城北十二里與金牛山遙遙對峙

蒼耳巖 在城北十二里李家溝側

丹花巖 在城北十五里垂崖色赭燦若丹花青衣水蕩潏其下因名

名山縣志卷二 山原

二十四

關口山 在城北十五里與雅安蘆山交界

小河坪 在城西一里

梨花岡 在城西三里府志漫山野梨花極盛

花溪山 在城西六里府志竹徑茶畦清溪翠筱幽境可居

丹鳳山 一名橫巖山在城西十里府志勢若丹鳳山皆赤色

門坎山 在城西十里府志一石長數丈似檻因名

落雲山 在城西十二里金雞橋側入雅安西路至此漸幽邃巖花溪草水聲潺潺風塵行客耳目爲之

一清漸上則金雞關也

鉢孟山 今名木魚山〔府志〕在蒙頂前

觀音巖 在木魚山下有觀音寺

三滴水巖 在木魚山下有響水灘

聖燈山 一名佛光山又名月光山在智矩寺西有聖燈寺千佛寺即輿地紀勝所稱夜多聖燈變現處也

鳳凰坪 在佛光山下

雷動坪 在智矩寺後〔府志〕引名碑錄遊人少涉不淨雷轟隱起未知然否

紅巖腦 在佛光山西交雅安界

金雞山 古名雞棟山一稱雞鳴山一稱弱棟坂又

名山縣志卷二 山原

二十五

稱名山蜀漢時置名山成隋因以名縣在城西十五里上即金雞關也舊傳唐爾朱通微修煉之所遙望之若羣雞對舞嘴距崩名雅在山麓交界觀察黃雲鵠書雄鎮西南第一關刻石立於上

〔元和志〕名山在縣西北十里又有名山水在百步
〔寰宇記〕雞鳴山在縣西南十七里地理志云蜀有雞鳴山俗傳云金雞鳴而天下太平則古之名山也因爲名山成唐垂拱年中廢成爲縣〔輿地紀勝〕古戍城在名山縣治圖經蜀姜維所築又云金□山在嚴道縣北三十五里俗傳古有金雞鳴□□又云爾朱真人修煉於金雞關後昇仙〔方輿〕□□

縣西南雞棟山上卽金雞關也唐志名山縣有雞棟關又云雞棟山在縣西南十七里一名雞鳴山王象之曰雞鳴山卽古之名山因爲名山戍隋以此名縣蓋卽州北之金雞山矣蜀典李膺益州記蜀人謂分嶺爲棟按寰宇記陽安縣西七十里有分棟山卽分嶺山也名山縣有弱棟坂又郡國志注犍爲有楊母弄棟之險若越絕書之棟山與鎮同按弱棟坂或卽雞棟山蓋此山亦分嶺也

宋姚萼金雞關六言詩二首
邛笮兩關壁峙蔡蒙四面屏開雲捧峩眉月出江滾平羌雪來甘露靈根不老爾朱丹竈空存三十六蒙好處倚欄役破

名山縣志卷二 山原

二十六

詩魂 又零句豐稷金雞關詩地勢雖重險人心自太平鵝潭開性鑿龍洞隔凡塵孫亞夫金雞關詩巖前霞綺紅如散林外茶槍綠未齊宋滋詩巖前雨過仙臺迴洞口雲歸藥竈閑 觀察黃雲鵠

詩四首遙通藏衛殊方靖邛笮西來第一山從此煙嵐千萬疊金雞未唱莫開關蒙蔡交并結好遊邊城佳氣接神州他時父老休相憶山自長青水自流此邦於我竟何緣三度來游七換年他日東歸誇父老從頭細話好山川丹竈遺蹤記爾朱洞門殘碣認模糊神仙救世心常在曾度西來幾丈夫 趙懿金雞關詩二首邛都西望莽風煙漏閣

靈關劍插天暗喜而今靖邊事百蠻朝貢太平年
見說雞鳴致太平沫關若徼得間征真人玉斧前
朝事難蜀文休誤長卿

芝麻山 在城西南七里

老虎岡 在城西南十五里

飛來岡 在城西南十許里與雅安交界居蒙溪雅
水之間突起突落故受是名登高望之諸峯聯沿若
龍脊者是也

化成山 在城西南十五里有古剎

挖斷山 在城西南十五里

瓠子門 在城西南二十里

名山縣志卷二 山原

二十七

鵝公包 在城西南二十里

馬頭岡 在城西南二十許里

屏風山 輿地紀勝在名山西南四十里以山形似
故名今未詳或云在雅安

石碑山 在城南七里瓦溝流經其下

筆山 一名碧山一名尖山在城南十里縣中惟此
峯最蒼秀有碧山廟祀趙順平侯

虎頭山 在城南十里

虎跳崖 在城南十里許府志虎跳橋有澗兩岸劃
分深數十丈天然一石片搭其上可通人行又緣東
數里有小虎跳狀亦如之

迴龍山 在城南二十里許府志左臨深壑前俯洄溪峭壁奇峰瀑布似飛龍人苦炎熱而山色如秋爲縣人避暑之所

高峯山 在城南二十里府志二十四盤至峯之頂冰縫山 在城南二十五里府志層崖中分里許深數丈形如口諺云冰縫騰口笑未詳所謂

雲臺山 在城南三十里

樺楸岡 在城南三十里

霄宮山 在城南三十里府志有雲霄宮縣令范時

鳴碑記碑載後寺觀

黃龍山 在城南三十里府志有黃龍廟

名山縣志卷二 山原

二十八

橫山 在城南三十里府志上有寺碑記山門面東巨川流西凡茶山層層峻峙四圍壩田中結是山儼如堂中一桌

石城山 在城南三十里許按輿地紀勝石城在車嶺鎮四山峭拔前通一徑可上有石筍八峯後有金鵝池府志一山突起四面峭壁如臺閣狀有石逕循腋而上歷大石門小石門至頂平坦如陟雲霄上有泉遇旱不竭雲吐則雨可立而待

明邑孝廉陳應正遊石城山記石城山距吾名山之東二十里許平地崛起如屏東遶長山西抱剗流水山小溪諸山擁其後蔡山平羌水峙流共前

環合若城而此山中立忽如堂中一鼎忽如海內
一舟忽如院中一馬近若不甚高遠則無不見或
大旱雲吐其上則雨可立待予每異之少以業舉
子未暇登也癸巳宦歸欲酬夙志嘗期吾同年友
蔡南李子未至明年秋日協一二同志登焉初至
其麓祇見四面壁削尋北腋下得一石路循而直
步山椒不覺心曠神怡脫然如陟雲霄之上俄而
四望則山旋如壁已而俯瞰則水迴如帶隴斷雜
於田間人家依於林麓蒼翠異狀星羅碁布同志
者咸訢訢然遂酌而飲既飲而遊則見東高處忽
開兩翼如兩腋高額下舊湧一泉如一鑑迤西數
十步則欲斷而連既伏而起忽聳一峯再行數步
又成一隴隴西則懸巖數百尺不敢俛視迺轉而
東尋舊道而下息於金剛僧寺與同志者言曰山
以形異人以山異此景在吾邑獨異俗尙淳龐人
多業儒自宋以來膺科第之選者歷有其人非得
此山之異與然未聞有登探者使殊勝鬱埋於荒
寂之墟以俟今日非數與吾儕相從今日之樂非
幸與雖然有是山無是人則俗無由醇山亦徒爲
異是人也者又此山可愛之原也而此山鍾秀自
茲以往人之盛必有倍於今日者亦不外於學也
吾又以勤學而望夫後之人眾莫不曰子之言不

徒遊觀耳其爲慮也遠矣蓋記諸予復曰蔡南吾
同年學行之尤者也因寓書相與評隲而人始定
吾邦君扶東山好古君子也聞而役夫運石邑博
林草亭閩中宿儒也屢書賀成之人曰今日之事
山有意於人邪人有意於山邪莫得而知也遂刻
石寄寺中柳子曰美不自美因人而彰予則何敢
當其人也又爲之詩曰一方贏得一山奇俗美人
賢總賴茲遠抱不連環峭壁中平獨起樹罽罍寒
泉噴壑青雲溼古道憑崖紫蔓垂四野川原遙入
望斯文載酒共登時大明嘉靖乙未仲冬朔石城
陳應正記

岢幕山 一作可募一名長秋山一名總岡山在城
南四十里府志東西綿亘數百里東連蒲江新津西
連雅安其南則峩眉地有迴龍天目諸山按洪雅縣志
崇峯峻嶺盤折蜿蜒其首爲洪雅縣其陽爲丹稜
其陰爲雅安名山蒲江諸縣山產茶及黃柏五倍子
諸材木公私資之總志總岡可募分爲二山誤

寰宇記蒲江有岢幕山通志岢幕山在邛州東南
七十里廢依政縣東其山壁立勢如屏幕山多材
木取資甚廣又云蒲江長秋山在縣東二十里相
傳宋有主簿王興好道於此得仙或謂卽寰宇記
所謂岢幕山也又云總岡山在洪雅縣西十里自

名山來逆折而西至雅州與蔡蒙接橫亘百里諸山多發脈於此故名

竹根坡 在城東南五里

靈鷲山 一名小鷲嶺在城東南十里雙松舖有廣福寺

黃鶴山 近小鷲嶺有 國初長沙知府周天章墓在焉周氏子孫世盛而其人無可攷矣

香爐山 在城東南十里府志其狀屹峙朝夕樹鎖雲煙眞佳境也按晏氏家譜香爐山在**砭砭**堡狀若香爐

輿地紀勝香爐山在名山東十五里四面峭拔以

狀名

二十四盤坡 在城東南二十許里徑絕陡險府志馬鬃嶺上有路通丹稜縣曲折二十四盤誤

五花山 一作五華在城東南三十五里府志有五花寨相傳武侯征孟獲於此下營五壘若蓮花

輿地紀勝礮石山在百丈西三十里其上坦平多

圓石舊傳武侯城守之地又礮門寨禁門有礮石

禁卽有亂石從空而下最爲邊民所敬號礮石將軍又云七縱橋在百丈縣

落孟山下古傳孔明擒孟獲之地按二山今皆不可攷五花山計里相近必居其一非礮石山卽落孟山也

邑貢生李作梅五花寨懷古詩懷古陟山巔層層
似花耀羌流遙瀉碧蒙頂斜陽照白叟與黃童爲
我一歡笑共說武鄉侯南征由此道山名號五花
漢兵曾埋竈地險自天成營嚴控蠻徼七縱而七
擒邊夷敢騰蹕聽罷觸余懷乘醉而搔首一自先
生還誰是補天手負嵎資敵強跳梁多小醜乾坤
幸清夷

聖德徧九有得攜謝朓詞高聲誦巖岫

韓山 在城東南三十五里府志峭石四壁萬木參
差一線鳥道通連邛崃

中峯山 在城東南三十五里府志來龍百里獨出
一山左降右伏精神百倍前迎後應氣象萬千乃神
之所司

花馬岡 在城東南四十里

月兒岡 在城東南四十里

煙花坪 在城東南四十里

柿子岡 在城東南五十里

鐵山 在城東南五十里

看燈山 在城東南五十里府志巍峩聳秀峙立空
青唐咸通中魯公輸遊觀有聖燈夜現遂鑄石巖石
像曰大佛巖千佛巖羅漢巖前又築聖燈臺一名看
燈臺又名觀燈臺

〔知縣徐元禧佛圖聖燈詩〕慧矩星星照誰知木葉
光燐燐飛曲澗閃閃度高岡月借清輝滿風吹紫
暈長老僧應未寐指點話迴廊

馬鬣嶺 在城東南七十里與總岡山相連屬

朱婆嶺 在城東南七十里

天目山 俗稱爲老峨眉在城東南七十里馬鬣嶺
後丹名交界處一峯削巒插入雲表遙望之若赤城
霞上有天目寺古佛洞最爲險峻奇壯

附記天目山俗傳吳僧理真初自嶺表攜茶植此
山即山崩地裂旋移植蒙頂又傳明萬厯間寺中
有外大石梯上註年月日前石柱長丈餘提擲六
慮祀榜曰楚山大王謂於乾橋洞下羽也此不經之
以祀榜曰楚山大王謂於乾橋洞下羽也此不經之

名山縣志卷二 山原 三十三

說姑附
於此

獐懶坡 〔輿地紀勝〕獐懶坡在百丈南四十里迂迴
迢遞雖獐行亦懶故名按獐懶坡以里計之當在馬
鬣天目之間

〔張維斗獐懶坡詩〕振足陟崇坡盤旋勢未已轉折
翠隨人舉目寒生砦高低矗沆漻坑陷煙霞起繁
英接雜花鵝黃錯狐紫驀地火燒空春薔拖茜被
坐令毛髮蒼叢林生旖旎奔泉走石罅冷冷冲革
鳥媧皇撒剩礫頑渣攪不理霹靂飛白日澎湃更
可喜達人憑大觀會境趣堪擬難以告俗僮只說
山多壘尋常目睫謀識不踰尺咫譬彼覆醯雞生

死銅甌裏還如齒牙蠹齧齧間已矣應被山靈笑
拘攣來足跂

佛鼻山 〔府志〕在縣東南百里峯巒秀異與峩眉瓦
屋接影聯輝上有大小青龍山白虎岡坡金竹林丁
木坡大小石甕大小石梯金師寨養天池按此山亦
近馬鬃嶺

天公坪 在城東三十許里

萬工坡 在城東四十里百丈驛〔府志〕引杜銘碑記
明太祖命藍玉收平雲南至此萬石巉岈鑿石通道
約費萬工因名

湧泉山 在城東四十里百丈驛〔府志〕有百丈井泉
神龍湧出

名山縣志卷二 山原

三十四

臥龍山 〔府志〕在百丈驛按與萬工坡連沿相屬宋
都巡檢使曹公廟在焉

〔知縣〕徐元禧遊臥龍山詩驚心戎馬暫時休吏卒
衙官又遠遊浩劫微塵紅土在叢林古木白雲留
獠牙獅吻饜風露染血雞冠傲冕旒偶得殘碑鈔
且讀叟叟請乞又旁啾

棲霞山 〔府志〕在百丈驛上有棲霞寺按棲霞寺宋
延禧觀也一名延禧山一名落魄山張落魄修道之
所寺甚闕敞山絕幽妙旁有玉液泉明學使王勅所
疏浚也有石碑存寺中縣令范時鳴有記載後寺觀

輿地紀勝落魄山在百丈東南相傳有張落魄修道於此今名延禧山

張落魄
詳人物

明學使王勅棲霞寺留題乘閒來訪梵王家古木
陰森暗落花野鶴乍驚門外客老僧常臥隴頭霞
尋山仗策叩崂竹汲水頻煎蒙頂茶卻笑禪家貪
課蜜檐前不厭鬧蜂衙

今原碑斷缺
爲另書一
通又有玉液泉迴文詩可

存不 知縣徐元禧遊棲霞寺詩關市無塵俗幽棲

此亦堪煙霞耽我癖泉石儘人憇樹密青螺隱花
香粉蝶探馬頭前更卻何處著精藍 趙懿詩落

魄仙人舊結茅晚風登眺磬初敲空山芋老僧攜
斲古寺楠陰鵲架巢百丈風煙眞秀遠三峩雲雪

名山縣志卷二 山原

三十五

最娥媯平生幽興常孤往帶月歸吟拂翠茝

刻石
寺中

又題玉液泉詩琤琤玉液清泉廢作蹶沔帶煙我
爲剔開蒙翳一方明鏡依然未識云玉液泉明學
使王舜田所疏浚也歲久湮沒今命僧復開之光

緒辛卯七月

刻石
井上

百丈山 府志引唐志百丈縣有百丈山元和志百
丈縣東有百丈穴故名明一統志百丈山在縣東北
六十里上有穴圓百丈深百丈因名按輿地紀勝百
丈山去本縣十五里縣因以得名寰宇記云本巖道
縣地李膺記臨叩縣南百二十里至百丈卽其地圖
經有一穴口方圓一百丈深百丈卽漢王陽爲益州

刺史行部至此興歎因之棄官唐武德元年置百丈鎮攷百丈廢縣在今縣東五十里晏家壩則山當亦近之也餘詳古蹟

大幕山 府志在城東四十里寰宇記大嶼山在縣東四十里南接河羅戍北入邛州高七十里上聳天際靈怪錯雜之所按明史地理志名山東有大幕山北接邛州界

銅鼓山 輿地紀勝在百丈南五里或傳以爲漢唐戍守之地今未詳所在蒲江縣志魚脊溝縣北三十里發源於銅鼓山據此當

在名蒲
交界處

米倉山 輿地紀勝在百丈縣禦侮城相對俗傳李

名山縣志卷二 山原

三十六

德裕積糧於此山以給諸軍今未詳禦侮城見古蹟

邛崃九折坂 輿地紀勝邛崃山在百丈西南九十里阻峻如羊腸卽漢書所謂邛崃九折坂也山巖峭峻竹高節中實堪爲杖元和郡縣志在榮經縣不同又云邛崃山一名邛苻山故苻人之界也山海經云崃山江水出焉多晴少雨華陽國志邛崃山本名邛苻通典百丈縣有九折坂卽漢王陽行部興歎之所攷山海經崃山江水所出東流注大江郭璞註邛崃山今在漢嘉嚴道縣南江所自出也漢書地理志蜀郡嚴道下邛崃山邛水所出東入青衣東漢郡國志蜀嚴道有邛僊九折坂劉昭註引華陽國

志邛崃山今名邛苻水經注崃山邛崃也在漢嘉嚴道縣一曰新道南山有九折坂夏則凝冰冬則毒寒王陽按轡處也元和郡縣志邛崃山自沈黎直走千里至臨邛環抱爲鎮山按後世各地志皆謂九折坂在榮經實則嚴道山皆邛崃山也九折坂亦非可鑿指

銅山 輿地紀勝在百丈東二十里舊經云卽鄧通鑄錢之所後以此假與卓王孫取千匹其山今出銅礦元和志及輿地廣記並謂此山屬榮經縣

攷漢志邛都南山出銅屬越巂郡水經注越巂靈道縣一名靈關道縣有銅山通志銅山在洪雅西南一百里近榮經縣界是銅山當在榮經也又通志云邛州銅官山在州東南二十里元和志鄧通所封後卓王孫買爲陶鑄之所象之所云或卽謂此惟里數仍不相近百丈縣別有一銅山耶

鐘山 輿地紀勝在百丈東北九十里形似鐘簾故名今未詳

銀山 輿地紀勝在百丈西南二百二十里今未詳或云在蘆山縣

錦鳳山 一作金鳳山一名鳳岡在城東北二十里萬古場後上有東嶽廟明建

雙青岡 在城東北二十五里

尖峯嶺 在城東北三十里三江壩一峯獨立尖如削成懸崖絕壁高數十丈其上平岡蜿蜒亦奇境也
香花崖 在城東北三十里有仙人洞崖下產霧鍾茶樹大合抱高二丈餘亭亭如蓋葉較他產麤厚酌入杯中雲霧蒙覆蓋佳品也餘詳物產

飛水崖 在城東北三十里

紅崖 在城東北三十里斬斬壁立百丈水所經一顆印 在城東北三十許里

石香爐 在城東北四十里

曬穀坪 在城東北四十里

水香坪 在城東北四十里

名山縣志卷二 山原

三十八

長腰山 在城東北五十里府志俗名黃土坡右峙蔡嶺左開蒙頂曲江前環高峯後疊巍然特出蔚然深秀

泉池山 府志在縣東北寰宇記百丈縣下泉池山在縣東四十里四面懸絕上有泉池因爲名

白馬山 一名白馬寨在城東北四十里下有白馬潭詳後水道

姑奴山 一名嚙嚙山在城東北六十里名印交界處深林密箐向多伏寇

上官山

高簡山

祈雨岡

換秀嶺

紗帽坪

交椅山

帽盒山

橫瓊山 或云山產白石膏

煙月岡 自上官山以下俱列府志今皆未得所攷

關隘

金雞關 卽金雞山見前連山若雞幘路通一綫古時戍守要隘東通縣城西窺雅安有高屋建瓴之勢關失則兩城危矣

青江堰 縣西南三十里無關可守而爲寇盜所必趨南則總岡山西則金雞關中爲一漕直通草壩言兵則此不可無備

黑竹關 縣東五十五里名蒲交界處無甚險隘

百丈驛 名山自百又以下卽平坦此爲一大要隘咸同間藍逆何螞蟻之難舉人樊包百丈敗績名山遂不守蓋逾此則長驅直入也

侯營 縣西南四十五里路通丹稜奇險可守

合江鎮 縣東南七十里唐合水戍也詳後水道馬鬣天目諸山至此漸平迤故爲丹蒲要路

夾門江 縣東北六十里名邛交界大道直貫縣境

腹心

名山縣志卷二 關隘

四十